

四庫全書

子部

欽定四庫全書

子部

朱子語類卷八十

詳校官中書臣程 炎

刑部郎中臣許兆椿覆勘

總校官中書臣朱 錡

校對官學正臣李 巍

謄錄舉人臣黃嵩齡

欽定四庫全書

朱子語類卷八十

詩一

綱領

只是思無邪一句好不是一部詩皆思無邪

溫柔敦厚詩之教也使篇篇皆是譏刺人安得溫柔敦

厚

因論詩曰孔子取詩只取大意三百篇也有會做底有

不會做底如君子偕老子之不淑云如之何此是顚  
然譏刺他到第二章已下又全然放寬豈不是亂道  
如載馳詩煞有首尾委曲詳盡非大段會底說不得  
又如鶴鳴做得極巧更含蓄意思全然不露如清廟  
一倡三歎者人多理會不得注下分明說一人倡之  
三人和之譬如今人挽歌之類今人解者又須要胡

說亂道

祖道

問剛詩曰那曾見得聖人執筆剛那箇存這箇也只得

就相傳上說去

賀孫

問詩次序是當如此否曰不見得只是楚茨信南山甫  
田大田諸詩元初却當作一片又曰如卷阿說豈弟  
君子是作賢者如泂酌說豈弟君子是作人君大抵  
詩中有可能比並者底有不可如此者自有這般樣

子

賀孫。說卷阿與詩傳不同。以下論詩次序章句

詩人只見他恁地重三疊四說將謂是無倫理次序不  
知他一句不胡亂下文蔚曰今日偶看棫樸一篇凡

有五章前三章是說人歸附文王之德後二章乃言文王有作人之功及紀綱四方之德致得人歸附者在此一篇之意次第甚明曰然遐不作人却是說他鼓舞作興底事功夫細密處又在後一章如曰勉勉我王綱紀四方四方便都在他線索內牽著都動文蔚曰勉勉即是純亦不已否曰然追琢其章金玉其相是那工夫到後文章真箇是盛美資質真箇是堅

實文蔚

恭父問詩章起於誰曰有故言者是指毛公無故言者皆是鄭康成有全章換一韻處有全押韻處如頌中有全篇句句是韻如殷武之類無兩句不是韻到稼穡匪解自欠了一句前章分章都曉不得某細讀方知是欠了一句賀孫

李善注文選其中多有韓詩章句常欲寫出易直子諒

韓詩作慈良

方子

問王風是他風如此不是降為國風曰其辭語可見風

多出於在下之人雅乃士夫所作雅雖有刺而其辭

莊重與風異

可學○以下論風雅頌

大序言一國之事係一人之本謂之風所以析衛為邶

衛音衛有鄘音故詩有鄘音者係之鄘有

邶音者係之邶若大雅小雅則亦如今之商調宮調  
作歌曲者亦按其腔調而作爾大雅小雅亦古作樂

之體格按大雅體格作大雅按小雅體格作小雅非

是做成詩後旋相度其辭目為大雅小雅也大抵國風是民庶所作雅是朝廷之詩頌是宗廟之詩又云小序漢儒所作有可信處絕少大序好處多然亦有不滿人意處去偽

器之間風雅與無天子之風之義先生舉鄭漁仲之說言出於朝廷者為雅出於民俗者為風文武之時周召之作者謂之周召之風東遷之後王畿之民作者謂之王風似乎大約是如此亦不敢為斷然之說但

古人作詩體自不同雅自是雅之體風自是風之體  
如今人做詩曲亦自有體製不同者自不可亂不必  
說雅之降為風今且就詩上理會意義其不可曉處  
不必反倒因說嘗見蔡行之與陳君舉說春秋云須  
先看聖人所不書處方見所書之義見成所書者更  
自理會不得却又取不書者來理會少間只是說得  
奇巧木

詩有是當時朝廷作者雅頌是也若國風乃採詩者採

之民間以見四方民情之美惡二南亦是採民言而  
被樂章爾程先生必要說是周公作以教人不知是  
如何某不敢從若變風又多是淫亂之詩故班固言  
男女相與歌詠以言其傷是也聖人存此亦以見上  
失其教則民慾動情勝其弊至此故曰詩可以觀也  
且詩有六義先儒更不曾說得明却因周禮說幽詩  
有幽雅幽頌即於一詩之中要見六義思之皆不然  
蓋所謂六義者風雅頌乃是樂章之腔調如言仲呂

調大石調越調之類至比興賦又別直指其名直叙其事者賦也本要言其事而虛用兩句釣起因而接續去者興也引物為況者比也立此六義非特使人知其聲音之所當又欲使歌者知作詩之法度也問幽之所以為雅為頌者恐是可以用雅底腔調又可用頌底腔調否曰恐是如此某亦不敢如此斷今只說恐是亡其二大雅

問二雅所以分曰小雅是所係者小大雅是所係者大

呦呦鹿鳴其義小文王在上於昭于天其義大問變雅曰亦是變用他腔調爾大抵今人說詩多去辨他序文要求著落至其正文關關雎鳩之義却不與理會王德修云詩序只是國史一句可信如關雎后妃之德此下即講師說如蕩詩自是說蕩蕩上帝序却言是天下蕩蕩賚詩自是說文王既勤止我應受之是說後世子孫賴其祖宗基業之意他序却說賚予也豈不是後人多被講師瞞耶曰此是蘓子由曾說來然亦有不通處如漢廣德廣所及

也有何義理却是下面無思犯禮求而不可得幾句却  
有理若某只上一句亦不敢信他舊曾有一老儒鄭漁仲  
更不信小序只依古本與疊在後面某今亦只如此令人  
虛心看正文久之其義自見蓋所謂序者類多世儒之  
談不解詩人本意處甚多且如止乎禮義果能止禮  
義否桑中之詩禮義在何處王曰他要存戒曰此正  
文中無戒意只是直述他淫亂事爾若鶉之奔奔相  
鼠等詩却是譏罵可以為戒此則不然某今看得鄭

詩自叔于田等詩之外如狡童子衿等篇皆淫亂之詩而說詩者誤以為刺昭公刺學校廢耳衛詩尚可猶是男子戲婦人鄭詩則不然多是婦人戲男子所以聖人尤惡鄭聲也出其東門却是箇識道理底人做雅

林子武問詩者中聲之所止曰這只是正風雅頌是中聲那變風不是伯恭堅要牽合說是然恐無此理今但去讀看便自有那輕薄底意思在了如韓愈說數

句其聲浮且淫之類這正是如此義剛

問比興曰說出那物事來是興不說出那物事是比如  
南有喬木只是說箇漢有游女奕奕寢廟君子作之  
只說箇他人心子忖度之關雎亦然皆是興體比  
底只是從頭比下來不說破興比相近却不同周禮  
說以六詩教國子其實只是這賦比興三箇物事風  
雅頌詩之標名理會得那興比賦時裏面全不大段  
費解今人要細解不道此說為是如奕奕寢廟不認

得意在那他人有心處只管解那奕奕寢廟植○以  
下賦比

興

問詩中說興處多近比曰然如關雎麟趾相似皆是興而兼比然雖近比其體却只是興且如關雎鴻本是興起到得下面說窈窕淑女此方是入題說那實事蓋興是以一箇物事貼一箇物事說上文興而起下文便接說實事如麟之趾下文便接振振公子一箇對一箇說蓋公本是箇好底人子也好孫也好族

人也好譬如麟趾也好定也好角也好及比則却入題了如此那一物說便是說實事如螽斯羽詵詵兮宜爾子孫振振兮螽斯羽一句便是說那人了下面宜爾子孫依舊是就螽斯羽上說更不用說實事此所以謂之北大率詩中比興皆類此個

比雖是較切然興却意較深遠也有興而不甚深遠者比而深遠者又係人之高下有做得好底有拙底常看後世如魏文帝之徒作詩皆只是說風影獨曹操

愛說周公其詩中屢說便是那曹操意思也是較別  
也是乖義剛

比是以一物比一物而所指之事常在言外興是借彼  
一物以引起此事而其事常在下句但比意雖切而  
却淺興意雖闊而味長賀孫

詩之興全無巴鼻

振錄云多是假他物舉起全不取其義

後人詩猶有此

體如青青陵上柏磊磊澗中石人生天地間忽如遠  
行客又如高山有峩林木有枝蔓來無端人莫之知

青青河畔草綿綿思遠道皆是此體方子○倪錄同

六義自鄭氏以來失之后妃自程先生以來失之后妃

安知當時之稱如何可學○以

下六義

或問詩六義注三經三綿之說曰三經是賦比興是做  
詩底骨子無詩不有才無則不成詩蓋不是賦便是  
比不是比便是興如風雅頌却是裏面橫串底都有  
賦比興故謂之三綿蘇

器之間詩傳分別六義有未備處曰不必又只管滯却

許多且看詩意義如何古人一篇詩必有一篇意思  
且要理會得這箇如柏舟之詩只說到靜言思之不  
能奮飛綠衣之詩說我思古人實獲我心此可謂止  
乎禮義所謂可以怨便是喜怒哀樂發而皆中節處  
推此以觀則子之不得於父臣之不得於君朋友之  
不相信皆當以此意處之如屈原之懷沙赴水賈誼  
言歷九州而相其君何必懷此都也便都過當了古  
人胷中發出意思自好看著三百篇詩則後世之詩

多不足觀矣木之

問詩傳說六義以托物興辭為興與舊說不同曰覺舊說費力失本指如興體不一或借眼前物事說將起或別自將一物說起大抵只是將三四句引起如唐時尚有此等詩體如青青河畔草青青水中蒲皆是別借此物興起其辭非必有感有見於此物也有將物之無興起自家之所有將物之有興起自家之所無前輩都理會這箇不分明如何說得詩本指只伊

川也自未見得看所說有甚廣大處子細看本指却  
不如此若上蔡怕曉得詩如云讀詩須先要識得六  
義體面這是他識得要領處問詩雖是吟咏使人自  
有興起固不專在文辭然亦須是篇篇句句理會著  
實見得古人所以作此詩之意方始於吟咏上有得  
曰固是若不得其真實吟咏箇甚麼然古人已多不  
曉其意如左傳所載歌詩多與本意元不相關問我  
將維天其右之既右享之今所解都作左右之右與

舊不同曰周禮有享右祭祀之文如詩中此例亦多  
如既右烈考亦右文母之類如我將所云作保祐說  
更難方說維羊維牛如何便說保祐到伊嘏文王既  
右享之也說未得右助之右問振鶩詩不是正祭之  
樂歌乃獻助祭之臣未審如何曰者此文意都無告  
神之語恐是獻助祭之臣古者祭祀每一受胙主與  
賓戶皆有獻酬之禮既畢然後亞獻至獻畢復受胙  
如此禮意甚好有接續意思到唐時尚然今併受胙於

諸獻既畢之後主與賓尸意思皆隔了古者一祭之中所以多事如季氏祭逮闇而祭日不足繼之以燭雖有強力之容肅敬之心皆倦怠矣有司跋倚以臨祭其為不敬大矣他日祭子路與室事交乎戶堂事交乎階質明而始行事晏朝而退孔子聞之曰誰謂由也而不知禮乎古人祭禮是大段有節奏賀孫

詩序起關雎后妃之德也正教以化之大序起詩者志之所之也止詩之至也

敬仲。以下大序

聲發出於口成文而節宣和暢謂之音乃合於音調如

今之唱曲合宮調商調之類

敬仲

詩大序亦只是後人作其間有病句

國史。方子

詩纔說得密便說他不著國史明乎得失之迹這一句  
也有病周禮禮記中史並不掌詩左傳說自分曉以  
此見得大序亦未必是聖人做小序更不須說他做  
小序不會寬說每篇便求一箇實事填塞了他有尋  
得著底猶自可通不然便與詩相礙那解底要就詩

却礙序要就序却礙詩詩之興是劈頭說那沒來由  
底兩句下面方說那事這箇如何通解鄭聲淫所以  
鄭詩多是淫佚之辭狡童將仲子之類是也今喚做  
忽與祭仲與詩辭全不相似這箇只是而今閒潑曲  
子南山有臺等數篇是燕享時常用底敘賓主相好  
之意一似今人致語又曰詩小序不可信而今看詩  
有詩中分明說是某人某事者則可知其他不曾說  
者而今但可知其說此等事而已韓退之詩曰春秋

書王法不誅其人身

高

大序亦有未盡如發乎情止乎禮義又只是說正詩變風何嘗止乎禮義

問止乎禮義曰如變風柏舟等詩謂之止乎禮義可也  
桑中諸篇曰止乎禮義則不可蓋大綱有止乎禮義者

止乎禮義如泉水載馳固止乎禮義如桑中有甚禮義  
大序只是揀好底說亦未盡當

詩大序只有六義之說是而程先生不知如何又却說從別處去如小序亦間有說得好處只是杜撰處多不知先儒何故不虛心仔細看這道理便只恁說却後人又只依他那箇說出亦不看詩是有此意無若說不去處又須穿鑿說將去又詩人當時多有唱和之詞如是者有十數篇序中都說從別處去且如蟋蟀一篇本其風俗勤儉其屋終歲勤勞不得少休及歲之暮方且相與燕樂而又遽相戒曰日月其除無

已太康蓋謂今雖不可以不為樂然不已過於樂乎  
其憂深思遠固如此至山有樞一詩特以和答其意  
而解其憂爾故說山則有樞矣隰則有榆矣子有衣  
裳弗曳弗妻子有車馬弗馳弗驅一旦宛然以死則  
他人藉之以為樂爾所以解勸他及時而樂也而序  
蟋蟀者則曰刺晉僖公儉不中禮蓋風俗之變必曰  
上以及下今謂君之儉反過於禮而民之俗猶知用  
禮則必無是理也至山有樞則以為刺晉昭公又大

不然矣若魚藻則天子燕諸侯而諸侯美天子之詩  
也采菽則天子所以答魚藻矣至鹿鳴則燕享賓客  
也序頗得其意四牡則勞使臣也而詩序下文則安  
矣皇皇者華則遣使臣之詩也棠棣則燕兄弟之詩  
也序固得其意伐木則燕朋友故舊之詩也人君以  
鹿鳴而下五詩燕其臣故臣受君之賜者則歌天保  
之詩以答其上天保之序雖畧得此意而古注言鹿  
鳴至伐木皆君所以下其臣臣亦歸美於上崇君之

尊而福祿之以答其歌却說得尤分明又如行葦自是祭畢而燕父兄者老之詩首章言開燕設席之初而懸懃篤厚之意已見於言語之外二章言侍御獻酬飲食歌舞之盛三章言既燕而射以為懽樂末章祝頌其既飲此酒皆得享夫長壽今序者不知本旨見有勿踐履之說則便謂仁及草木見戚戚兄弟便謂親睦九族見黃耇台背便謂養老見以祈黃耇便謂乞言見介爾景福便謂成其福祿細細碎碎殊無

倫理其失為尤甚既醉則父兄所以答行葦之詩也  
鳬鷺則祭之明日繹而賓尸之詩也古者宗廟之祭  
皆有尸既祭之明日則煖其祭食以燕為尸之人故  
有此詩假樂則公尸之所以答鳬鷺也今序篇皆失  
之又曰詩即所謂樂章雖有唱和之意祇是樂工代  
歌亦非是君臣自歌也

道夫

詩書序當開在後面

升卿○以下小序

敬之間詩書序曰古本自是別作一處如易大傳班固

序傳並在後京師舊本揚子注其序亦摠在後明德

王德修曰六經惟詩最分明曰詩本易明只被前面序作梗序出於漢儒反亂詩本意且只將四字成句底詩讀却自分曉見作詩集傳待取詩令編排放前面驅逐過後面自作一處文蔚

詩序作而觀詩者不知詩意節

詩序東漢儒林傳分明說道是衛宏作後來經意不明都是被他壞了某又看亦不是衛宏一手作多是

兩三手合成一序愈說愈踈浩云蘇子由却取小序曰他雖不取下面言語留了上一句便是病根伯恭專信序又不免牽合伯恭凡百長厚不肯非毀前輩要出脫回護不知道只為得箇解經人却不曾為得聖人本意是便道是不是便道不是方得浩

詩小序全不可信如何定知是美刺那人詩人亦有意思偶然而作者又其序與詩全不相合詩詞理甚順平易易看不如序所云且如葛覃一篇只是見葛而

思歸寧序得却如此毛公全無序解鄭間見之序是  
衛宏作

序極有難曉處多是附會如魚藻詩見有王在鎬之  
言便以為君子思古之武王似此類甚多

因論詩歷言小序大無義理皆是後人杜撰先後增益  
湊合而成多就詩中採摭言語更不能發明詩之大  
旨纔見有漢之廣矣之句便以為德廣所及才見有  
命彼後車之言便以為不能飲食教載行葷之序但

見牛羊勿踐便謂仁及草木但見戚戚兄弟便謂親  
睦九族見黃耆台背便謂養老見以祈黃耆便謂乞  
言見介爾景福便謂成其福祿隨文生義無復倫理  
卷耳之序以求賢審官知臣下之勤勞為后妃之志  
事固不倫矣况詩中所謂嗟我懷人其言親暱太甚  
寧后妃所得施於使臣者哉桃夭之詩謂婚姻以時  
國無鰥民為后妃之所致而不知其為文王刑家及  
國其化固如此豈專后妃所能致耶其他變風諸詩

未必是刺者皆以為刺未必是言此人必附會以為  
此人柔中之詩放蕩留連止是淫者相戲之辭豈有  
刺人之惡而反自陷於流蕩之中子衿詞意輕儇亦  
豈刺學校之辭有女同車等皆以為刺忽而作鄭忽  
不娶齊女其初亦是好底意思但見後來失國便將  
許多詩盡為刺忽而作考之於忽所謂淫昏暴虐之  
類皆無其實至遂目為狡童豈詩人愛君之意况其  
所以失國正坐柔懦闊踈亦何狡之有幽厲之刺亦

有不然甫田諸篇凡詩中無詆譏之意者皆以為傷  
今思古而作其他謬誤不可勝說後世但見詩序巍  
然冠於篇首不敢復議其非至於解說不通多為飾  
辭以曲護之者其誤後學多矣大序却好或者謂補  
湊而成亦有此理書小序亦未是只如堯典舜典便  
不能通貫一篇之意堯典不獨為遜舜一事舜典到  
歷試諸艱之外便不該通了其他書序亦然至如書  
大序亦疑不是孔安國文字大抵西漢文章渾厚近

古雖董仲舒劉向之徒言語自別讀書大序便覺軟慢無氣未必不是後人所作也謨

詩序實不足信向見鄭漁仲有詩辨妄力詆詩序其間言語太甚以為皆是村野妄人所作始亦疑之後來子細看一兩篇因質之史記國語然後知詩序之果不足信因是看行草賓之初筵抑數篇序與詩全不相似以此看其他詩序其不足信煞多以此知人不可亂說話便都被人看破了詩人假物興辭大率將

上句引下句如行葷勿踐履戚戚兄弟莫遠具爾行  
葷是比兄弟勿字乃興莫字此詩自是飲酒會賓之  
意序者却牽合作周家忠厚之詩遂以行葷為仁及  
草木如云酌以大斗以祈黃耇亦是歡合之時祝壽  
之意序者遂以為養老乞言豈知祈字本只是祝頌  
其高壽無乞言意也抑詩中間煞有好語亦非刺厲  
王如於乎小子豈是以此指其君兼厲王是暴虐大  
惡之主詩人不應不述其事實只說謹言節語况厲

王無道謗訕者必不容武公如何恁地指斥曰小子國語以為武公自警之詩却是可信大率古人作詩與今人作詩一般其間亦自有感物道情吟咏情性幾時盡是譏刺他人只緣序者立例篇篇要作美刺說將詩人意思盡穿鑿壞了且如今人見人纔做事便作一詩歌美之或譏刺之是甚麼道理如此一似里巷無知之人胡亂稱頌諛說把持放鶻何以見先王之澤何以為情性之正詩中數處皆應答之詩如

天保乃與鹿鳴為唱答行葦與既醉為唱答蟋蟀與  
山有樞為唱答唐自是晉未改號時國名自序者以為  
刺僖公便牽合謂此晉也而謂之唐乃有堯之遺風本  
意豈因此而謂之唐是皆鑒說但唐風自是尚有勤儉  
之意作詩者是一箇不敢放懷底人說令我不樂日月  
其除便又說無已太康職思其居到山有樞是答者使  
謂子有衣裳弗曳弗妻寃其死矣他人是愉子有鍾鼓  
弗鼓弗考究其死矣他是保這是答他不能享些快

活徒德地苦澀詩序亦有一二有憑據如清人碩人載  
馳諸詩是也昊天有成命中說成王不敢康成王只是  
成王何須牽合作成王業之王自序者恁地附會便謂  
周公作此以告成功他既作周公告成功便將成王字  
穿鑿說了又幾曾是郊祀天地被序者如此說後來遂  
生一場事端有南北郊之事此詩自說昊天有成命又  
不曾說著地如何說道祭天地之詩設使合祭亦須幾  
句說及后土如漢諸郊祀詩祭其神便說某事若用以

祭地不應只說天不說地東萊詩記却編得仔細只是大本已失了更說甚麼向嘗與之論此如清人載馳一二詩可信渠却云安得許多文字證據某云無證而可疑者只當闕之不可據序作證渠又云只此序便是證某因云今人不以詩說却以序解詩是以委曲牽合必欲如序者之意寧失詩人之本意不恤也此是序者大害處賀孫

詩序多是後人妄意推想詩人之美刺非古人之所作

也古人之詩雖存而意不可得序詩者妄誕其說但  
疑見其人如此便以為是詩之美刺者必若人也如  
莊姜之詩却以為刺衛頃公今觀史記所述頃公竟  
無一事可紀但言某公卒于某公立而已都無其言  
頃公固亦是衛一不美之君序詩者但見其詩有不  
美之迹便指為刺頃公之詩此類甚多皆是妄生美  
刺初無其實至有不能攷者則但言刺詩也思賢妃  
也然此是汎汎而言如漢廣之序言德廣所及此語

最亂道詩人言漢之廣矣其言已分曉至如下面小序却說得是謂文王之化被于南國美化行乎江漢之域無思犯禮求而不可得也此數語却好又云看來詩序當時只是箇山東學究等人做不是箇老師宿儒之言故所言都無一事是當如行葦之序雖皆是詩人之言但却不得詩人之意不知而今做義人到這處將如何做於理決不順某謂此詩本是四章八句他不知作八章章四句讀了如敷彼行葦牛

羊勿踐履方苞方體惟葉泥泥戚戚兄弟莫遠具爾  
或肆之筵或授之几此詩本是興詩即是興起下四  
句言以行葦興兄弟勿踐履是莫遠意也又云鄭衛  
詩多是淫奔之詩鄭詩如將仲子以下皆鄙俚之言  
只是一時男女淫奔相誘之語如桑中之詩云衆散  
民流而不可止故樂記云桑間濮上之音亡國之音  
也其衆散其民流誣上行私而不可止也鄭詩自緇  
衣之外亦皆鄙俚如采蘋采艾青衿之類是也故夫

子放鄭聲如抑之詩非詩人作以刺君乃武公為之  
以自警又有稱小子之言此必非臣下告君之語乃  
自謂之言無疑也卓

問詩傳盡撤去小序何也曰小序如碩人定之方中等  
見於左傳者自可無疑若其他刺詩無所據多是世  
儒將他謚號不美者援就立名爾今只考一篇見是  
如此故其他皆不敢信且如蘇公刺暴公固是姓暴  
者多萬一不見得是暴公則惟暴之云者只作一箇

狂暴底人說亦可又如將仲子如何便見得是祭仲某由此見得小序大故是後世陋儒所作但既是千百年已往之詩今只見得大意便了又何必要指實得其人姓名於看詩有何益也

雅大

問詩傳多不解詩序何也曰某自二十歲時讀詩便覺小序無意義及去了小序只玩味詩詞却又覺得道理貫徹當初亦嘗質問諸鄉先生皆云序不可廢而某之疑終不能釋後到三十歲斷然知小序之出於

漢儒所作其為謬戾有不可勝言東萊不合只因序  
講解便有許多牽強處某嘗與之言終不肯信讀詩  
記中雖多說序然亦有說不行處亦廢之某因作詩  
傳遂成詩序辨說一冊其他謬戾辨之頗詳

輝

鄭漁仲謂詩小序只是後人將史傳去揀并省謔却附  
會作小序美刺

振

伯恭黨得小序不好使人看著轉可惡

振

器之間詩叶韻之義曰只要音韻相叶好吟哦諷誦易

見道理亦無甚要緊今且要將七分工夫理會義理  
三二分工夫理會這般去處若只管留心此處而於  
詩之義却見不得亦何益也又曰叶韻多用吳才老  
本或自以意補入木之。以  
下論詩韻

問詩叶韻是當時如此作是樂歌當如此曰當時如此  
作古人文字多有如此者如正考父鼎銘之類可學  
問先生說詩率皆叶韻得非詩本樂章播諸聲詩自然  
叶韻方諧律呂其音節本如是耶曰固是如此然古

人文章亦多是叶韻因舉王制及老子叶韻處數段  
又曰周頌多不叶韻疑自有和底篇相叶清廟之瑟  
朱絃而疏越一唱而三歎歎即和聲也

儒用

詩之音韻是自然如此這箇與天通古人音韻寬後人分  
得密後隔開了離騷注中發兩箇例在前朕皇考曰  
伯庸庚寅吾以降<sub>洪</sub>又重之以修能<sub>耐</sub>納秋蘭以為  
佩後人不曉却謂只此兩韻如此某有楚詞叶韻作

子厚名字刻在漳州

方子

叶韻恐當以頭一韻為準且如華字叶音敷如有女同  
車是第一句則第二句顏如舜華當讀作敷字然後  
與下文佩玉瓊琚洵美且都皆叶至如何彼穠美唐  
棣之華是第一韻則當依本音讀而下文王姬之車  
却當作尺奢反如此方是今只從吳才老舊說不能  
又創得此例然楚詞紛余既有此內美兮又重之以  
以修能能音耐然後下文紂秋蘭以為佩叶若能字  
只從本音則佩字遂無音如此則又未可以頭一韻

為定也

閻祖

吳才老補韻甚詳然亦有推不去者某煞尋得當時不  
曾記今皆忘之矣如外禦其務叶然也無戎才老無  
尋處却云務字古人讀做蒙不知戎汝也汝戎二字  
古人通用是協音汝也如南仲太祖太師皇父整我  
六師以修我戎亦是協音汝也下民有嚴叶不敢怠  
遑才老欲音嚴為莊云避漢諱却無道理某後來讀  
楚辭天問見一嚴字乃押從莊字乃知是叶韻嚴讀

作昂也天問才老豈不讀往往無甚意義只恁打過

去也

義剛○饒何氏錄云中庸奏格無言奏音族平聲音駿所以毛詩作駿字

或問吳氏叶韻何據曰他皆有據泉州有其書每一字

多者引十餘證少者亦兩三證他說元初更多後刪

去姑存此耳然猶有未盡因言商頌天命降監下民

有嚴不僭不濫不敢怠遑吳氏云嚴字恐是莊字漢

人避諱改作嚴字某後來因讀楚辭天問見嚴字都

押入剛字方字去又此間鄉音嚴作戶剛反乃知嚴

字自與皇字叶然吳氏豈不曾看楚詞想是偶然失之又如兄弟閔于牆外禦其務每有良朋來也無戎吳氏復疑務當作蒙以叶戎字某却疑古人訓戎為汝如以佐戎辟戎雖小子則戎女音或通後來讀常武詩有云南仲太祖太師皇父整我六師以修我戎則與汝叶明矣因言古之謠謡皆押韻如夏謡之類散文亦有押韻者如曲禮安民哉叶音茲則與上面思辭二字叶美又如將上堂聲必揚將入戶視必下下

叶音護禮運孔子閒居亦多押韻莊子中尤多至於易象辭皆韻語也

又云禮記五至三無處皆協○廣

知子之來訛之雜佩以贈入之此例甚多作字作保字作補往近王舅近音既說文作新誤寫作近

當

問詩叶韻有何所據而言曰叶韻乃吳才老所作某又續添減之蓋古人作詩皆押韻與今人歌曲一般今人信口讀之全失古人詠歌之意

燁

詩音韻間有不可曉處因說如今所在方言亦自有音

韻與古合處子升因問今陽字却與唐字通清字却  
與青字分之類亦自不可曉曰古人韻疎後世韻方  
嚴密見某人好考古字却說青字音自是親如此類  
極多本  
之

器之間詩曰古人情意溫厚寬和道得言語自恁地好  
當時叶韻只是要便於諷詠而已到得後來一向於  
字韻上嚴切却無意思漢不如周魏晉不如漢唐不  
如魏晉本朝又不如唐如元微之劉禹錫之徒和詩

猶自有韻相重密本朝和詩便定不要一字相同不知却愈壞了詩本之

論讀詩

詩中頭項多一項是音韻一項是訓詁名件一項是文體若逐一根究然後討得些道理則殊不濟事須是通悟者方看得方子○以下總論讀詩之方

聖人有法度之言如春秋書禮是也一字皆有理如詩亦要逐字將理去讀便都礙了淳

問聖人有法度之言如春秋書與周禮字較實詩無理  
會只是看大意若要將序去讀便礙了問變風變雅  
如何曰也是後人恁地說今也只依他恁地說如漢  
廣汝墳皆是說婦人如此則是文王之化只及婦人  
不及男子只看他大意恁地拘不得寓

公不會看詩須是他詩人意思好處是如何不好處  
是如何看他風土看他風俗又看他人事物態只看  
伐檀詩便見得他一箇清高底意思看碩鼠詩便見

他一箇暴斂底意思好底意思是如此不好底是如  
彼好底意思令自家善意油然感動而興起者他不  
好底自家心下如着創相似如此看方得詩意側

詩有說得曲折後好底有只恁平直說後是好底如燕  
燕末後一章這不要看上文考下章便知得是恁地  
意思自是高遠自是說得那人著義剛

林子武說詩曰不消得恁地求之太深他當初只是平  
說橫者也好豎者也好今若要討箇路頭去裏面尋

却怕迫窄了

義剛

讀詩之法且如白華管兮白茅束兮之子之遠俾我獨兮蓋言白華與茅尚能相依而我與子乃相去如此之遠何哉又如倬彼雲漢為章于天周王壽考遐不作人只是說雲漢恁地為章于天周王壽考豈不能作人也上兩句皆是引起下面說畧有此意思傍著不須深求只此讀過便得

個

看詩且看他大意如衛諸詩其中有說時事者固當細

考如鄭之淫亂底詩苦苦搜求他有甚意思一日看五六篇可也偶

看詩義理外更好者他文章且如谷風他只是如此說出來然而叙得事曲折先後皆有次序而今人費盡氣力去做後尚做得不好議

讀詩且只將做今人做底詩看或每日令人誦讀却從旁聽之其詰有未通者畧檢注解看却時時誦其本文便見其語脉所在又曰念此一詩既已記得其語

却逐箇字將前後一樣字通訓之今注解中有一字而兩三義者如假字有云大者有云至者只是隨處旋紐裡耳非通訓也

管

先生因言看詩須并叶韻讀便見得他語自整齊又更畧知叶韻所由來甚善又曰伊川有詩解數篇說到小雅以後極好蓋是王公大人好生地做都是識道理人言語故它裏面說得儘有道理好仔細看非如國風或出於婦人小夫之口但可觀其大槩也

銖

問以詩觀之雖千百載之遠人之情偽只此而已更無兩般曰以某看來須是別換過天地方別換一樣人情釋氏之說固不足據然其書說盡百千萬劫其事情亦只如此而已況天地無終窮人情安得有異必大者詩不要死煞看了見得無所不包今人看詩無興底

意思

節○以下論  
讀詩在興起

讀詩便長人一格如今人讀詩何緣會長一格詩之興最不緊要然興起人意處正在興會得詩人之興便

有一格長豐水有芑武王豈不仕蓋曰豐水且有芑  
武王豈不有事乎此亦興之一體不必更注解如龜  
山說關雎處意亦好然終是說死了如此便詩眼不

活必大

問向見呂丈問讀詩之法呂丈舉橫渠置心平易之說  
見教某遵用其說去誦味來固有箇涵泳情性底道  
理然終不能有所啓發程子謂興於詩便知有著力  
處今讀之止見其善可為法惡可為戒而已不知其

他如何著力曰善可為法惡可為戒不特詩也他書  
皆然古人獨以為興於詩者詩便有感發人底意思  
今讀之無所感發者正是被諸儒解殺了死著詩義  
興起人善意不得如南山有臺序云得賢則能為邦  
家立太平之基蓋為見詩中有邦家之基字故如此  
解此序自是好句但纔如此說定便局了一詩之意  
若果先得其本意雖如此說亦不妨正如易解若得  
聖人繫辭之意便橫說豎說都得今斷以一義解定

易便不活詩所以能興起人處全在興如山有樞隰  
有榆別無意義只是興起下面子有車馬子有衣裳  
耳小雅諸篇皆君臣燕飲之詩道主人之意以譽賓  
如今人宴飲有致語之類亦間有叙賓客答辭者漢  
書載客歌驪駒主人歌客母庸歸亦是此意古人以  
魚為重故魚麗南有嘉魚皆特舉以歌之儀禮載乃  
間歌魚麗笙由庚歌南有嘉魚笙崇丘歌南山有臺  
笙由儀本一套事後人移魚麗附於鹿鳴之什截以

嘉魚以下為成王詩遂失當時用詩之意故胡亂解  
今觀魚麗嘉魚南山有臺等篇辭意皆同青義湛露  
蓼蕭皆燕飲之詩詩中所謂君子皆稱賓客後人却  
以言人君正顛倒了如以湛露為恩澤皆非詩義故  
野有蔓草零露湑兮亦以為君之澤不下流皆局於  
一箇死例所以如此周禮以六詩教國子當時未有  
注解不過教之曰此興也此比也此賦也興者人便  
自作興者比者人便自作比者興只是興起謂下句

直說不起故將上句帶起來說如何去上討義理今  
欲觀詩不若且置小序及舊說只將原詩虛心熟讀  
徐徐玩味俟彷彿見箇詩人本意却從此推尋將去  
方有感發如人拾得一箇無題目詩再三熟看要須  
辨得出來若被舊說一局局定便看不出今雖說不  
用舊說終被他先入在內不期依舊從它去某向作  
詩解文字初用小序至解不行處亦曲為之說後來  
覺得不安第二次解者雖存小序間為辨破然終是

不見詩人本意後來方知只盡去小序便自可通於是盡滌舊說詩意方活又曰變風中固多好詩雖其間有沒意思者然亦須得其命辭遣意處方可觀後人便自做箇道理解說於其造意下語處元不及究只後代文集中詩亦多不解其辭意者樂府中羅敷行羅敷即使君之妻使君即羅敷之夫其曰使君自有婦羅敷自有夫正相戲之辭又曰夫婿從東來千騎居上頭觀其氣象即使君也後人亦錯解了須得

其辭意方見好笑處

必大

學者當興於詩須先去了小序只將本文熟讀玩味仍不可先看諸家注解看得久之自然認得此詩是說箇甚事謂如拾得箇無題目詩說此花既白又香是盛寒開必是梅花詩也卷阿名康公戒成王其始只說箇好意思如豈弟君子皆指成王純嘏爾壽之類皆說優游享福之事至有馮有翼以下方說用賢大抵告人之法亦當如此須先令人歆慕此事則其肯

從吾言必樂為之矣人

讀詩正在於吟咏諷誦觀其委曲折旋之意如吾自作此詩自然足以感發善心今公讀詩只是將已意去包籠他如做時文相似中間委曲周旋之意盡不曾理會得濟得甚事若如此看只一日便可觀盡何用逐日只捱得數章而又不曾透徹耶且如人入城郭須是逐街坊里巷屋廬臺榭車馬人物一一看過方是今公等只是外面望見城是如此便說我都知得

了如鄭詩雖淫亂然出其東門一詩却如此好女曰  
鷄鳴一詩意思亦好讀之真箇有不知手之舞足之

蹈者

問〇以下論詩  
在熟讀玩味

詩如今恁地注解了自是分曉易理會但須是沈潛諷  
誦玩味義理咀嚼滋味方有所益若只草草看過一部  
詩只三兩日可了但不得滋味也記不得全不濟  
事古人說詩可以興須是讀了有興起處方是讀詩  
若不能興起便不是讀詩因說永嘉之學只是要立

新巧之說少間指摘東西闢湊零碎便立說去縱說得是也只無益莫道又未是本之

讀詩之法只是熟讀涵泳自然和氣從胷中流出其妙處不可得而言不待安排措置務自立說只恁平讀著意思自足須是打疊得這心光蕩蕩地不立一箇字只管虛心讀他少間推來推去自然推出那箇道理所以說以此洗心便是以這道理盡洗出那心裏物事渾然都是道理上察曰學詩須先識得六義體

面而諷詠以得之此是讀詩之要法看來書只是要  
讀讀得熟時道理自見切忌先自布置立說

問學者誦詩每篇誦得幾遍曰也不曾記口人覺得熟便  
止曰便是不得須是讀熟了文義都曉得了涵泳讀  
取百來遍方見得那好處那好處方出方見得精怪  
見公每日說得來乾燥元來不曾熟讀若讀到精熟  
時意思自說不得如人下種子既下得種了須是討  
水去灌溉他討糞去培擁他與他耘鋤方是下工夫

養他處今却只下得箇種子了便休都無耘治培養  
工夫如人相見纔見了便散去都不曾交一談如此  
何益所以意思都不生與自家都不相入都恁地乾  
燥這箇貪多不得讀得這一篇恨不得常熟讀此篇  
如無那第二篇方好而今只是貪多讀第一篇了便  
要讀第二篇讀第二篇了便要讀第三篇恁地不成  
讀書此便是大不敬此句厲聲說須是殺了那走作底心  
方可讀書

大凡讀書先曉得文義了只是常常熟讀如看詩不須  
得著意去裏面訓解但只平平地涵泳自好因舉池  
之竭矣不云自頻泉之竭矣不云自中四句吟咏者  
久之又曰大雅中如蒸民板抑等詩自有好底董氏  
舉侯芭常言衛武公作抑詩使人日誦於其側不知  
此出在何處他讀書多想見是如此又曰如孟子也  
大故分曉也不用解他熟讀滋味自出燮孫

先生問林子武看詩何處曰至大雅大聲曰公前日方

看節南山如何恁地快恁地不得而今人看文字敏  
底一揭開板便曉但於意味却不曾得便只管看時  
也只是恁地但百遍自是強五十遍時二百遍自是  
強一百遍時題彼脊令載飛載鳴我日斯邁而月斯  
征夙興夜寐無忝爾所生這箇看時也只是恁地但  
裏面意思却有說不得底解不得底意思却在說不  
得底裏面又曰生民等篇也可見祭祀次第此興儀

禮正相合

議

問時舉者文字如何曰詩傳今日方看得綱領要之緊  
要是要識得六義頭面分明白則詩亦無難者者曰讀  
詩全在諷詠得熟則六義將自分明白須使篇篇有箇  
下落始得且如子善向者易傳往往畢竟不曾熟如  
此則何緣會浹洽橫渠云書須成誦精思多在夜中  
或靜坐得之不記則思不起今學者看文字若記不得  
則何緣貫通時舉曰緣資性魯鈍全記不起曰只  
是貪多故記不得福州陳正之極魯鈍每讀書只讀

五十字必三二百遍而後能熟積習讀去後來却赴  
賢良要知人只是不會耐苦耳凡學者要須做得人  
難做底事方好若見做不得便不去做要任其自然  
何緣做得事成功宜勉之時舉

問晉詩如何曰方晉得關雎一篇未有疑處曰未要去  
討疑處只熟晉某注得訓詁字字分明便却玩索涵  
泳方有所得若便要立議論往往裏面曲折其實未  
曉只髣髴見得便自虛說耳恐不濟事此是三百篇

之首可更熟看

時舉

先生謂學者曰公看詩只看集傳全不看古注曰某意  
欲先看了先生集傳却看諸家解曰便是不如此無  
却看底道理才說却理會便是悠悠語今見看詩不  
從頭看一過云且等我看了一箇了却看那箇幾時  
得再看如廝殺相似只是殺一陣便了不成說今夜  
且如此廝殺明日又重新殺一番個

文蔚泛看諸家詩說先生曰某有集傳後只看集傳先

生又曰曾參看諸家否曰不曾曰却不可

文蔚

解詩

漢書傳訓皆與經別行三傳之文不與經連故石經書公羊傳皆無經文藝文志云毛詩經二十九卷毛詩詁訓傳三十卷是毛為詁訓亦不與經連也馬融為周禮註乃云欲省學者兩讀故具載本文然則後漢以來始就經為注未審此詩引經附傳是誰為之其毛詩二十九卷不知併何卷也

毛鄭所謂山東老學究歐陽會文章故詩意得之亦多  
但是不合以今人文章如他底意思去看故皆局促  
了詩意古人文章有五七十里不回頭者蘇黃門詩  
說疎放覺得好報

歐陽公有詩本義二十餘篇然說得有好處有詩本末  
篇又有論云何者為詩之本何者為詩之末詩之本  
不可不理會詩之末不理會得也無妨其論甚好近  
世自集注文字出此等文字都不見了也害事如呂

伯恭讀詩記人只是看這箇它上面有底便看無底  
更不知看了個

因言歐陽永叔本義而曰理義大本復明於世固自周  
程然先此諸儒亦多有助舊來儒者不越注疏而已  
至永叔原父孫明復諸公始自出議論如李泰伯文  
字亦自好此是運數將開理義漸欲復明於世故也  
蘓明允說歐陽之文處形容得極好近見其奏議文  
字如回河等劄子皆說得盡誠如老蘓所言便如詩

本義中辨毛鄭處文辭舒緩而其說到底不可移易

營

程先生詩傳取義太多詩人平易恐不如此

橫渠云置心平易始知詩然橫渠解詩多不平易程子說胡安定解九四作太子事云若一爻作一事只做得三百八十四事此真看易之法然易傳中亦有偏解作一事者林文軒嘗云伊川解經有說得未的當處此文義間事安能一一皆是若大頭項則伊川底

却是此善觀伊川者陸子靜看得二程低此恐子靜  
看其說未透耳譬如一塊精金却道不是金非金之  
不好蓋是不識金也

人傑○必大錄云橫渠解悠  
悠蒼天此何人哉却不平易

子由詩解好處多歐公詩本義亦好因說東萊改本書  
解無闕疑處只據意說去木之間書解誰底好者曰  
東坡解大綱也好只有說如說人心惟危這般處便  
說得差了如今看他底須是識他是與不是處始得

之本

問讀詩記序中雅鄭邪正之說未明日向來看詩中鄭  
詩邶鄘衛詩便是鄭衛之音其詩大段邪淫伯恭直  
以謂詩皆賢人所作皆可歌之宗廟用之賓客此甚  
不然如國風中亦多有邪淫者又問思無邪之義曰  
此只是三百篇可蔽以詩中此言所謂無邪者讀詩  
之大體善者可以勸而惡者可以戒若以為皆賢人  
所作賢人決不肯為此若只一鄉一里中有箇恁地  
人專一作此怨刺恐亦不靜至於皆欲被之絃歌用

之宗廟如鄭衛之詩豈不亵瀆用以祭幽厲寢姒可也施之賓客燕饗亦待好賓客不得須衛靈陳幽乃可耳所謂詩可以興者使人興起有所感發有所懲創可以觀者見一時之習俗如此所以聖人存之不盡刪去便盡見當時風俗媿惡非謂皆賢人所作耳大序說止乎禮義亦可疑小序尤不可信皆是後人託之仍是不識義理不曉事如山東學究者皆是取之左傳史記中所不取之君隨其謚之美惡有得惡

謚及傳中載其人之事者凡一時惡詩盡以歸之最  
是鄭忽可憐見鄭風中惡詩皆以為刺之伯恭又欲  
主張小序煅煉得鄭忽罪不勝誅鄭忽却不是狡若  
是狡時它却須結齊國之援有以鉗制祭仲之徒決  
不至於失國也謚法中如墮覆社稷曰頃便將柏舟  
一詩硬差排為衛頃公便云賢人不遇小人在側更無分  
疏處愿而無立曰僖衡門之詩便以誘陳僖愿而無  
立志言之如子矜只是浮奔之詩豈是學校中氣象

褰裳詩中子惠思我褰裳涉溱至狂童之狂也且豈  
不是淫奔之辭只緣左傳中韓宣子引豈無他人便  
將做國人思大國之正已不知古人引詩但借其言  
以寓己意初不理會上下文義偶一時引之耳伯恭  
只詩綱領第一條便載上蔡之說上蔡費盡辭說只  
解得箇怨而不怒纔先引此便是先瞎了一部文字

眼目

審

問今人自做一詩其所寓之意亦只自曉得前輩詩如

何可盡解曰何況三百篇後人不肯道不會須要字  
字句句解得麼

當時解詩時且讀本文四五十遍已得六七分却看諸  
人說與我意如何大綱都得之又讀三四十遍則道  
理流通自得矣

或問詩曰詩幾年埋沒被某取得出來做公們看得恁  
地搭滯着十年仍舊死了那一部詩今若有會讀書  
底人看某詩傳有不活絡處都塗了方好而今詩傳

只堪減不堪添

胡永

伯恭說詩太巧亦未必然古人直不如此今某說皆直

靠直說

楊

李茂欽問先生曾與東萊辨論淫奔之詩東萊謂詩人所作先生謂淫奔者之言至今未曉其說曰若是詩人所作譏刺淫奔則婺州人如有淫奔東萊何不作一詩刺之茂欽又引他事問難先生曰未須別說只為我答此一句來茂欽辭窮先生曰若人家有隱僻

事便作詩評其短譏刺此乃今之輕薄子好作謔詞嘲鄉里之類為一鄉所疾害者詩人溫醇必不如此如詩中所言有善有惡聖人兩存之善可勸惡可戒

杞

某解詩多不依他序縱解得不好也不過只是得罪於作序之人只依序解而不攷本詩上下文意則得罪於聖賢也

楊

因說學者解詩曰某舊時看詩數十家之說一一都從

頭記得初間那裏敢便判斷那說是那說不是看熟久之方見得這說似是那說似不是或頭邊是尾說不相應或中間數句是兩頭不是或尾頭是頭邊不是然也未敢便判斷疑恐是如此又看久之方審得這說是那說不是又熟看久之方敢決定斷說這說是那說不是這一部詩并諸家解都包在肚裏公而今只是見已前人解詩便也要注解更不問道理只認捉著便據自家意思說於已無益於經有害濟得

甚事凡先儒解經雖未知道然其盡一生之力縱未  
說得七八分也有三四分且湏熟讀詳究以審其是  
非而為吾之益今公纔看便妄生去取肆以已意  
是發明得箇甚麼道理公且說人之讀書是要將作  
甚麼用所貴乎讀書者是要理會這箇道理以反之  
於身為我之益而已問

詩傳中或云姑從或云且從其說之類皆未有所攷不  
免且用其說洪壽

詩傳只得如此說不容更著語工夫却在讀者必

大

問分詩之經詩之傳何也曰此得之於呂伯恭風雅之正則為經風雅之變則為傳如屈平之作離騷即經也如後人作反騷與夫九辯之類則為傳耳

蟬



朱子語類卷八十